

Fanm kréyòl

Fout fanm fò

Lè fanm fè tan fè fòs pou fò¹....

Lè an gadé an rétrovizè a vi a fanm, an vwè....

Fanm féba

Lè an tan a gangann, jèrè é dèt nonm pasé men si tèt si kò si fès pou té montré kimoun ki ka pézé

fanm pran fè, sipòté san di ayen, san moukté, san dlo koulé an zyé

Lè an tan gran-anman, yo pran volé chalanndé pou on ayen, pou on gadé, pou on palé

fanm pran kouraj, kenbé pou fanmi, pou pitit, pou dèmen méyé

Lè an tan a anman, yo di-y sé-y ki poto-mitan pou kenbé tout fétya a fanmi-la

fanm pran sanfwa anba pawòl-anmè a timoun malobljan, anba jiré a mari wonmyè é dézòdyè

Lè an tan « tifanm », yo kwè kò sé paspò pou vwayajé an syèl san niyaj

fanm sèvi é nonm pou on travay, pou on dèkwa, pou pouvwa

fanm soufè

fanm pran fè

fanm pran plon

fanm pran gaz

fout fanm...

Men fi-anmizi an gadé douvan é an vwè...

Fanm ka pran doubout a yo

Ka lèvé tèt, soukwé baton maréchal pou di « Awa ! »

« Aséfyé ! Aséfyé ! an pa on jwé p'ou ka jouvé épi mwen konsa !

an sé fanm-chatengn ka tonbé pou woulévé pli bòsko lè kalpata ka fésé zépòl

an sé fanm-mayolèz ka fè baton pran lanvòl lè fò rantré an lalit pou on kòz ki jis

an sé fanm-gyenm ka tòd é détòd fil lè toumantri a Lavi ka planni an syèl a pitit

an sé fanm-didiko ka bat lèstonmak apré lapenn fè dlo koulé dan zyé

an sé fanm-laplenn-lin ka ba Nonm fòs pousé an jaden a lasosyété

An sé... fanm kréyòl !

tèt an mwen sé on kalbas larézon douvan pwofitasyon

kè an mwen sé ponm-kannèl lanmou pou sianka rayisman

bouch an mwen sé kofré pawòl-senk-é-kat douvan pawòl-bigidi

é vant an mwen sé nich a Limanité

an sé...fanm kréyòl !

fanm ki fò lè an ka pran tan fè fòs pou fò ! »

Miryèl CLODINE-FLORENT

Zabitan, févriyé 2021

1. Jobi Bernabé, « Fanm » (1985)

